

Julie James AS

Y Cwnsler Cyffredinol a'r Gweinidog Cyflawni

15 Tachwedd 2024

Annwyl Julie,

Y Bil Deddfwriaeth (Gweithdrefn, Cyhoeddi a Diddymiadau) (Cymru)

Diolch ichi am ymddangos gerbron y Pwyllgor ar 5 Tachwedd 2024 i lywio ei drafodaeth ar y Bil Deddfwriaeth (Gweithdrefn, Cyhoeddi a Diddymiadau) (Cymru).

Mae'r Pwyllgor yn ddiolchgar am eich ymrwymiad i roi ymateb ysgrifenedig ynglŷn â'ch barn ar y rhestr o welliannau wedi'u didoli ar gyfer deddfwriaeth, ac mewn perthynas â phwerau benthyca Awdurdod Datblygu Cymru.

Fel y dywedais ar ddiwedd y cyfarfod, byddwn hefyd yn ddiolchgar pe gallai eich ymateb gynnwys rhagor o wybodaeth ynghylch materion eraill, a nodir yn yr Atodiad.

A fydddechystal ag ymateb erbyn dydd Iau 5 Rhagfyr 2024?

Yn gywir,

Mike Hedges

Mike Hedges

Cadeirydd



Atodiad

1. O ran eich cyfrifoldeb am oruchwyllo'r amserlen ar gyfer y Rhaglen Ddeddfwriaethol, a chyflawni'r Rhaglen honno, a wnewch chi amlinellu pam y gwnaed y penderfyniad i roi mwy o flaenoriaeth i gyflwyno'r Bil hwn nag i'r posibilrwydd o gyflwyno Bil gan y Senedd a fyddai'n cynnwys darpariaethau sy'n ymddangos ar hyn o bryd yn neddfwriaeth Llywodraeth y DU, megis yn y Bil Hawliau Rhentwyr?
2. Nid yw'r Memorandwm Esboniadol (y Memorandwm) yn cyfeirio at effaith y Bil ar hawliau dynol. A wnewch chi nodi:
 - a yw Llywodraeth Cymru wedi cynnal asesiad o oblygiadau darpariaethau'r Bil o ran hawliau dynol; ac
 - yn benodol, a yw Llywodraeth Cymru o'r farn y bydd adran 2 o'r Bil yn cael unrhyw effaith ar hawliau dynol?
3. Mae'r Memorandwm, ym mharagraff 82, yn dweud "nad oes bwriad uniongyrchol" i ddefnyddio'r pwerau yn adran newydd 37F(2)(c) o *Ddeddf Deddfwriaeth (Cymru) 2019* (Deddf 2019) a pharagraff 6(3)(c) o Atodlen newydd 1A iddi, fel y'u mewnosodir gan adran 1 o'r Bil. Mae'r Memorandwm yn mynd ymlaen i nodi, fodd bynnag, ei bod yn "beth call sicrhau bod mecanwaith priodol ar gael i alluogi deddfiadau penodol i gael eu rhestru pe bai'r Senedd neu Weinidogion Cymru yn ystyried nad oes angen gosod offerynnau penodol gerbron y Senedd." A wnewch chi ddarparu:
 - cyfiawnhad pellach dros gynnwys y pwerau hyn, pan fo'n ymddangos nad oes bwriad i'w defnyddio; ac
 - esboniad o pam y penderfynwyd rhoi'r pwerau hyn i Weinidogion Cymru, yn hytrach na gadael i'r Senedd benderfynu ym mhob deddfiad?
4. A wnewch chi roi rhagor o fanylion ynghylch sut y bydd adran newydd 37Z(2) o Ddeddf 2019, sy'n ei gwneud yn ofynnol i Weinidogion Cymru lunio a chyhoeddi penderfyniad ynghylch rhifo a dosbarthu offerynnau statudol Cymreig, yn gweithredu'n ymarferol?
5. A wnewch chi amlinellu pam y mae angen cynnwys y ddarpariaeth ym mharagraff 7 o Atodlen 1A, sy'n rhoi pwerau dirprwyedig i Weinidogion Cymru i ddiwygio unrhyw ddeddfiad i adlewyrchu effaith yr Atodlen, neu i wneud darpariaeth sy'n ganlyniadol arni?
6. A wnewch chi nodi a oes unrhyw ddarpariaethau yn y Bil a fyddai'n galluogi Gweinidogion Cymru i newid y weithdrefn sydd ynghlwm wrth bŵer presennol sydd wedi'i ddirprwyo i Weinidogion Cymru?

7. Yn ystod y sesiwn dystiolaeth, cyfeiriodd eich swyddog at y ffaith bod y Bil yn creu rhwymedigaeth newydd ar Argraffydd Deddfau Seneddol y Brenin i gyhoeddi deddfwriaeth Gymreig ar ffurf gyfredol. Nododd eich swyddog hefyd y bydd y Bil yn llenwi bylchau penodol eraill mewn perthynas ag Argraffydd y Brenin. A wnewch chi amlinellu'r bylchau hyn a sut y mae'r Bil yn ceisio ymdrin â hwy?

8. Mae'r Memorandwm, ym mharagraffau 70 i 72, yn amlinellu gwaith ymgynghori sy'n berthnasol i ddiddymu Mesur Diogelwch Tân Domestig (Cymru) 2011 yn y Bil. Yn benodol, mae'n cyfeirio at ymgynghoriad ar gynnwys systemau chwistrellu mewn cartrefi gofal i blant; fodd bynnag – fel y dywed y Memorandwm hefyd – bwriedid i'r Mesur fod yn gynnwys "ym mhob preswylfa newydd a phob preswylfa sydd wedi ei throsi". A wnewch chi ddarparu:

- amlinelliad o unrhyw waith ymgynghori pellach sydd wedi'i wneud mewn perthynas â'r bwriad hwn i ddiddymu'r Mesur;
- eich asesiad o effeithiau symud gofynion ynghylch systemau chwistrellu o ddeddfwriaeth sylfaenol i is-ddeddfwriaeth; a
- chadarnhad ynghylch a yw'r Rheoliadau Adeiladu presennol yn darparu'r un lefel o ofynion o ran systemau chwistrellu ag a oedd wedi'u cynnwys yn y Mesur?

9. Mae'r Memorandwm, ym mharagraffau 60 a 61, yn dweud nad yw'r Bil bellach yn cynnwys diddymu adrannau 53 i 56 o *Ddeddf Cefn Gwlad a Hawliau Tramwy 2000*, wedi iddynt gael eu cychwyn yn Lloegr, er mai polisi Llywodraeth Cymru o hyd yw na chaiff y darpariaethau hyn eu cychwyn. A wnewch chi ddarparu:

- rhagor o wybodaeth ynghylch penderfyniad Llywodraeth Cymru i beidio â chynnwys y darpariaethau hyn yn y Bil;
- esboniad ynghylch a allai fod wedi ychwanegu "in England" at ddiwedd y darpariaethau perthnasol, yn hytrach na diddymu'r adrannau. Ymddengys y byddai hynny'n cyd-fynd â'r diddymiadau eraill yn y Bil; ac
- amlinelliad o oblygiadau posibl unrhyw benderfyniadau a wneir yn y dyfodol gan Lywodraeth y DU i gychwyn darpariaethau eraill y mae'r Bil yn cynnig eu diddymu?

10. A wnewch chi amlinellu a oes unrhyw oblygiadau i'r cyfeiriadau at yr Alban mewn darpariaethau yn *Neddf Diwydiant 1979* a *Deddf Diwydiant 1980* y cynigir eu diddymu?

11. A wnewch chi nodi a oes gan Lywodraeth Cymru gynlluniau ar gyfer rhaglen i ddiddymu cyfreithiau yn y dyfodol, ac os felly, pryd y disgwylir i Fil sy'n cynnwys darpariaethau o'r fath gael ei gyflwyno?

- 12.** A wnewch chi nodi a ystyriwyd unrhyw ofyniad i addasu enw hir Deddf 2019 o ganlyniad i'r Bil?
- 13.** Pan fyddwch mewn sefyllfa i wneud hynny, a wnewch chi roi'r wybodaeth ddiweddaraf am drafodaethau Llywodraeth Cymru â Llywodraeth y DU mewn perthynas â chydysyniadau Gweinidog y Goron sy'n angenrheidiol i sicrhau bod y Bil o fewn cymhwysedd deddfwriaethol y Senedd?